



Po nalogu Tužilaštva SIPA uhapsila šestericu Srba Uposlenik UIO optužen za ratni zločin u Kotor-Varoši

Ahmet Ćirkić, bivši logoraš, od prije rata poznaje šestericu Srba optuženih za ratne zločine koje su pripadnici SIPA-e jučer uhapsili na području Banje Luke, Kotor-Varoši i Prnjavora.

- Žive lagodnim životom, kao da ništa nisu krivi. Jedni rade na carini, drugi se bave privatnim biznisom - kaže Ćirkić, koji je 14 mjeseci proveo u logoru, prije nego je 1993. godine oslobođen posredstvom Međunarodnog Crvenog krsta.

Jedan od uhapšenih Aleksandar Petrović, radi u Upravi za indirektno oporezivanje (UIO) od njenog osnivanja. Prije toga radio je u Upravi carina RS-a.

-Petrović radi u Carinskoj ispostavi Gradiška - potvrdio nam je glasnogovornik UIO Ratko Kovačević.

Ćirkić je u logoru preživio torture, o kojima je već svjedočio pred Sudom BiH. Prisjeća se da su fizičko i psihičko maltretiranje, iscrpljivanje i nedostatak hrane

bili svakodnevnica. Pamti i nekoliko ubistava, te kaže da su optuženi bili „na visokim pozicijama“.

Pored spomenutog Petrovića, uhapšeni su Janko Trivić, Nedeljko Đekanović, Manojlo Tepić, Boško Peulić i Slobodan Župljanin. Oni se terete da su u svojstvu visokih dužnosnika vojske počinili progon oko 5000 Bošnjaka i Hrvata iz Kotor-Varoši, u okviru čega su počinjena ubistva najmanje 300 osoba, te mučenja, zlostavljanja, silovanja,

nezakonita zatočenja, pljačkanja i drugi oblici zločina.

Navedene aktivnosti rezultat su višemjesečne i sveobuhvatne istrage, u kojoj su tužilac i stručno osoblje Tužilaštva BiH ispitali više stotina svjedoka, te proveli veći broj dana na terenu u intenzivnom prikupljanju dokaza. Nadležni tužilac danas će odlučiti hoće li zatražiti određivanje mjere pritvora ili mjera zabrane.

S.K.A.